

Sistema Atensaun no Responde Sedu (atRes) iha ho apoiu fundu husi UNOPS-Peacebuilding Support Office (PBSO) no SASCAS (agora hanaran: Gabinete Apoiu Sociedade Sivil) husi Governu kontinua implementa servisu monitorizasaun ba insidente violénsia ne'ebé akontese iha periodu Janeiru-Marsu 2024. Sistema ne'e hanesan baibain, parseria ho rede monitorizador iha baze atu halibur informasaun kona-ba insidente violénsia sira. Insidente ne'ebé rekolla ona regulármente haruka ba koordinador munisipiu sira hodi rejistu iha sistema baze de dadus nasonál ho sistema online. Jestor baze de dadus iha nasonál uza dadus ne'e hodi halo verifikasaun ikus no haruka ba jestor programa hodi analiza ba kauza sira ne'ebé hamosu insidente violénsia ne'ebé akontese. Ba maluk sira ne'ebé interese ba dadus insidente no atividade prevensaun konfliktu no harii dame iha comunidade ne'ebé akontese iha Timor-Leste, bele asesu iha www.atres.belun.tl

Revista situaasaun periodu ne'e, kobre Munisipiu Baukau, Bobonaro, Covalima, Dili, Ermera no Vikeke, ho postu administrativu 15 mak hanesan, Postu Administrativu Balibo, Baukau, Bobonaro, Cristo Rei, Dom Aleixo, Ermera, Letefoho, Lolotoe, Maliana, Maucatar, Nain Feto, Ossu, Suai Vila, Uatulari no Vikeke Vila. Parseiru monitorizador hamutuk na'in 9 (mane 6, feto 3), hamutuk ho koordinador munisipiu nain 6 (Mane 3 feto 3) mak servisu hamutuk ho monitorizador sira iha area kobertura koleasaun dadus nian. Postu Administrativu tolu husi programa UNOPS no PBSO koleasaun dadus kobre direktamente husi koordinador munisipiu sira mak hanesan Postu Administrativu Cristo Rei, Vikeke Vila no Maliana Vila. Dadus insidente iha Munisipiu 6 periodu ne'e deskreve tuir mai:

ASUNTU NE'EBÉ PRESIZA TAU ATENSAUN

- ▶ **Violensia domestika 64**
- ▶ **Insidente violensia tanba disputa rai 35**
- ▶ **Insidente ho envolvimentu oknum GAM 24**
- ▶ **Violensia seksual iha 14**

| Total Insidente Munisipiu | | % |
|---------------------------|------------|----------------|
| Dili | 47 | 19.42% |
| Bobonaro | 45 | 18.60% |
| Ermera | 42 | 17.36% |
| Baukau | 37 | 15.29% |
| Vikeke | 36 | 14.88% |
| Covalima | 35 | 14.46% |
| Total | 242 | 100.00% |

**INSIDENTE VIOLÉNSIA
IHA BAUKAU, BOBONARO, DILI, ERMERA, COVALIMA NO VIKEKE,
PERIDU JANEIRU-MARSU 2024**

Belun ho nia Sistema atRes iha periodu ne'e ho apoiu parseiru husi UNOPS-PBSO no SASCAS, kontinua rekolla dadus insidente iha munisipiu 6 ho total insidente hamutuk 242 ho percentajen as mak Dili no Ermera; Maske nune'e la dun iha dferensa makaas ho munisipiu haat seluk. Haree husi jéneru perpetrador nian, husi total insidente 242, envolvimentu perpetrador mane hamutuk 212, feto hamutuk 10 envolvimentu mane no feto hamutuk 11, envolvimentu ema deskoñesidu hamutuk 8 no LGBTQ ema nain 1.

Enkuantu vitima iha insidente sira ne'e, mane 120, feto 100, no vitima feto no mane hamutuk 20 no la hatene 2. Perpetrador ne'ebé envolve iha insidente sira jerálmenta mak membru comunidade hela iha uma hanesan ka hela iha uma seluk, viziñu, membru Instituisaun governu, membru konsellu suku no perpetrador sira nia knaar ka pozisaun barak liu agrikultor ho total insidente hamutuk 89, la hatene knaar iha 67, membru GAM no GAR hamutuk iha insidente 24, knaar seluk ne'ebé la fixa iha formatu hamutuk 21, estudante iha insidente 18, ema dezempregu hamutuk insidente 11, ofosiál governu hamutuk insidente 5, Mestre iha insidente 2, PNTL iha insidente 2, membru konsellu suku, militante partidu no seguransa privadu, ida-idak insidente 1.

Maneira no sasan ne'ebé uza hodi halo violensia husi perpetrador sira iha periodu ne'e barak liu mak isin lolon (ez. liman, ain, nehan, nsst) hamutuk iha insidente 120, tuir fali mak istori malun ka haksasuk malu, nsst iha insidente 118, ameasa liafuan ka fiziku iha insidente 89, uza fatuk iha insidente 48, uza ai-dona ka besi kanu iha insidente 28, uza sasan seluk iha insidente 21, uza pistola iha insidente 2 no ikus liu mak uza diman, iha insidente 1. Haree husi numeru total sasan ka meus ne'ebé uza iha insidente violensia hatudu katak, iha kada insidente perpetrador sira uza meus liu husi ida ka oioin (laos meus ida de'it iha kada insidente).

Fator sira kontribui barak liu ba hamosu insidente violensia sira ne'e mak perpetrador no vitima lanu kontribui ba insidente 15, Odiu vingansa kontribui ba insidente 11, Xiumentu sosial iha insidente 10, problema entre Grupu Arte Marsial (GAM) kontribui ba insidente 10, abandona ka la tau matan ba familia kontribui ba insidente 9, problema liga ho osan kontribui ba insidente 6, disputa eransa liga ba rai ba toos no natar iha insidente 5 no Adulteiiru kontribui ba insidente 8. Fator sira seluk maske la barak maibé mos kontribui makaas ba hamosu insidente violensia hatudu iha grafiku kona-ba fatores sira kontribui ba insidente, iha pajina sira tuir mai.

Impaktu husi insidente iha periodu ida ne'e, ema mate hamutuk na'in 6 (mane 4, fetu 2) husi postu administrativu 4 Bobonaro, Maliana, Cristo rei no Balibo. Ema hetan kanek todan hamutuk nain 10 (mane 6, fetu 4) husi postu administrativu 6 iha Dom Aleixo, Ermera, Letefoho, Maliana, Nain Fetu ho Lolotoe. Ema hetan kanek kmaan hamutuk nain 85 (Mane 65, Fetu 20 husi Dili 24 (Mane 19, fetu5), Ermera 22 (Mane 17, fetu 5), Bobonaro na'in 20 (mane 17, fetu 3), Vikeke na'in 10 (mane 6, fetu 4), Baukau na'in 7 (mane 5, fetu 2) no Covalima na'in 2 (mane 1, fetu1). Ema sente la seguru no halai husi fatin insidente iha 17, animal mate iha insidente 2, Iha insidente 8 mak rezulta ema nia sasan privadu hanesan janela, odomatan uma no loja hetan estragus husi parte sira iha insidente. Nune'e mos transporte privadu no publiku hanesan mikrolet 4, kareta privadu 3, motor 3 no seluk tan. Estraga mos sasan privadu sira seluk hanesan makina halo blok, bikan no kadeira sira.

Husi insidente 242 ne'e, iha insidente 53 mak monitorizador ka koordinador munisipiu atRes hanoin katak, insidente violensia ne'e bele kontinua ka akontese fila fali, uainhira la tau atensaun ho didi'ak, entaun, odiu vingansa sei kontinua eziste entre parte sira, nune'e bele hamosu insidente iha tempu oin.

INSIDENTE VIOLENSIA DOMESTIKA 64 IHA BAUKAU, VIKEKE, COVALIMA, DILI, ERMERA NO BOBONARO

Violensia domestikika iha periodu ne'e akontese iha Munisipiu 6 hamutuk 64 aas iha Baukau 16 (postu administrativu Baukau iha 16) no Vikeke iha 16 (Vikeke Vila 7, Ossu 5, Uatulari 4), Dili 9 (Dom Aleixo 6, Nain Fetu 2 no Cristo Rei 1), Ermera 8 (Letefoho 5 no Ermera 3) no Bobonaro 4 (Maliana 3 no Bobonaro vila 1). Insidente Violensia Domestika ne'e barak liu akontese entre parseiru intimu sira no mos ba membru familia hela iha uma hanesan mak parseiru intimu iha insidente 53 no entre membru familia hela iha uma hanesan iha insidente 11.

Ema ne'ebé responde ba insidente sira ne'e barak liu membru familia husi perpetrador no vitima mak responde ba insidente 35, vizinu responde ba insidente 26, membru konsellu suku responde mos ba insidente 12, husi parte PNTL intervein iha insidente 10, Kolega envolve ba responde iha insidente 9, lia nain laos membru konsellu suku intervein iha insidente 5, ema seluk iha insidente 2 no veteran envolve ba responde iha insidente. Enkuantu insidente 23 la iha ema ida mak intervein.

Kauza ka fatores kontribui ba insidente violensia hirak ne'e mak sentimentu xiumentu, deskonfia malun komete adulteiru, lanu, problema osan, no deskontamentu ba hahalok entre parte sira.

INSIDENTE VIOLENSIA TANBA DISPUTA RAI IHA 35

Insidente violensia tanba asunto disputa rai ka propriedade iha periodu ne'e hamutuk insidente 35 iha munisipiu Covalima iha insidente 14 (problema rai iha insidente 7, problema rai ba toos iha insidente 3, problema tanba baliza iha insidente 1 no tanba rai eransa iha insidente 3, Dili iha insidente 7 (tanba disputa rai iha insidente 6 no disputa tanba baliza iha insidente 1), Ermera iha insidente 6 (insidente tanba disputa rai iha 4, Problema rai ba uma fatin iha insidente 1 no insidente tanba problema rai ba toos no uma fatin iha insidente 1), Baukau iha insidente 4 tanba de'it disputa rai, iha Bobonaro iha insidente 2 tanba de'it disputa rai nune'e mos iha Vikeke iha insidente 2 tanba disputa rai no disputa rai ba toos.

Maioria mane hanesan perpetrador iha insidente 26 enkuantu insidente 7 envolve fetu no mane, LGBTI hanesan perpetrador iha insidente 1 no ida seluk envolve perpetrador fetu. Vitima iha disputa rai sira ne'e mane iha 20, Fetu iha 8, fetu no mane iha insidente 6 no vitima deskoñesidu iha insidente 1. Husi insidente 35 ne'e, insidente 25 membru familia husi perpetrador no Vitima mak intervein, insidente 22 intervein mos husi viziñu, kolega intervein iha insidente 14, membru konsellu suku intervein iha insidente 10, PNTL intervein iha insidente 8 no insidente 6 mak envolve intervensaun lia nain laos membru konsellu suku.

INSIDENTE HO ENVOLVIMENTU OKNUM GAM IHA 24




Insidente ho envolvimentu oknum membru grupu Arte Marsial no Grupo Arte ritual iha periodu ne'e hamutuk iha insidente 24; akontese iha Dili insidente 10, Covalima insidente 6, iha Ermera insidente 5 no iha Bobonaro insidente 3.





Iha fatores oioin mak sai kauza ba insidente hirak ne'e mak hanesan, provoka malu iha 8, tanba odio malun iha 5, la gosta malun iha 3, la hatene tanba saida iha 3 no kauza selu-seluk hanesan deskonfia tama grupu seluk, tanba de'it diferensa iha grupu, la simu grupu seluk tanba provoka malun husi telefoni no tanba vitima tama GAM seluk. Husi insidente 24 ne, PNTL mak intervein barak liu hamutuk insidente 20, tuir fali mak membru familia husi perpetrador no vitima, intervein iha insidente 9, membru konsellu suku intervein iha insidente 7 nune'e mos kolega intervein iha insidente 7, seluk mak viziñu intervein ba insidente 6, lia nain laos membru konsellu suku intervein iha insidente 3, mestre no F-FDTL ida-idak intervein iha insidente 2 no la hatene se mak intervein, seluk, sociedade sivil ka NGO no la iha ema ida mak intervein, ida-idak iha insidente 1

VIOLENSIA SEKSUÁL IHA 14

Violensia seksuál inklui kualker aktu fiziku ou seksuál ne'ebé mosu ho dalan forsa ka intimida kontra vontade vitima nian ka ho bosok vitima. Sira ne'e inklui asaltu seksuál, abuzu seksuál no formas seluk abuzu nian iha kontestu seksuál. Violensia seksuál iha periodu ne'e hamutuk 14 mak hanesan violasaun seksuál 8 (inklui ba menoridade 1), asediu/abuzu seksuál 4, asaltu seksuál 1 no tentativa ba abuzu seksuál 1. Violensia seksuál iha periodu ida ne'e akontese iha Munisipiu Vikeke ho numeru insidente hamutuk 5 tuir fali iha Ermera ho Numeru insidente hamutuk 4, Baukau insidente 3 no iha Dili insidente 1. Barak liu akontese iha uma privadu hamutuk 9, 2 akontese iha dalan, akontese iha eskola insidente 1 no iha fatin osoladu insidente 1. Fator ne'ebé kontribui ba akontese insidente hirak ne'e, bele influensia husi fatores ne'ebé variadu, inklui inbalansu poder, atitude sosial kona-ba jéneru no sexualidade, lanu ka uzu alkool, falta edukasaun kona-ba konsentimentu no bele mos tanba fator psikolojiku individual husi perpetrador.

GRAFIKU KARATERÍSTIKA JERÁL INSIDENTE





ATIVIDADE Belun PREVENSAUN KONFLITU NO HARII DAME

- ❖ Iha fulan Janeiru 2024, Belun hametin nia parseria ho Atividade USAID iha Timor Leste, realiza atividade formasaun kona-ba Transformasaun Konfliktu Sensível ba Jéneru no Deziminasun Informasaun kona-ba Papél no Responsabilidade PNTL ho nia Maneira Atuasaun ba aktu violénsia no Lei Kontra Arma Brangka e



Arte Marsiais ba Belun nia konstituente sira iha postu Dom Aleixo no Metinaro. Objektivu husi atividade ne'e atu hametin koñesimentu no kapasidade comunidade feto, mane no joven Inkluzivu sira hodi bele hakbiit sira ba responde no prevene konfliktu iha sira nia moris lor-loron iha comunidade. Total partisipante iha atividade ne'e hamutuk na'in 36, kompostu husi feto 11 no mane 25. Programa ida ne'e realiza ho apoiu fundu husi Actividade USAID/Boa Governasaun no Advokasia.

- ❖ Iha Loron 24 Janeiru 2024, belun liu husi Programa "Mitigasaun no Adaptasaun Mudansa Klimátika", kuda Ai-Parapa hun 1,040, iha suku Labarai-Lagoa Tasi Ninin ho total partisipante iha atividade ne'e hamutuk nain 124 (feto 38, mane 86, mai husi Representante Prezidente Autoridade Munisipiu Covalima, Administrador Postu Administrativu (APA) Suai vila no APA Maucatar, Konsellu suku Belecasak ho Labarai, inklui lia nain, xefe Aldeia ho Delegadu/a, PNTL, Instituisaun Floresta, Ambiental no Ministeriu Agrikultura e Peska, membru grupu Wee Kaduak ho grupu sira iha Busadao no comunidade (juventude inklui labarik sira). Atividade ne'e realiza ho apoiu fundu husi UNDP-GEF.



- ❖ Alein atividade kuda ai parapa, comunidade husi membru grupu Wee Kaduak hamutuk 13, kuda aihan sira ba nesesidade tempu naruk no tempu badak hanesan batar, aifarina, fehuk, fore xikote, brinjela, mostarda, kangko, aidila no hudi iha toos, ho luan besik ektare 2, iha aldeia Holba Suku Labarai ho partisipante hamutuk ema 13 (feto 6, mane 7). Atividade ne'e realiza ho assistensia husi koordinador Munisipiu Belun no Ekxensionista Ministeriu agrikultura iha Munisipiu Covalima. Atividade ne'e hetan mos fundu husi UNDP-GEF



- ❖ Iha 21 Feveireiru 2024, Belun fasilita Membru grupu Haburas Wee Kaduak estabese Kooperativa Imprestimu ne'ebé sirkula deit iha grupu nia laran, hafoin hetan tiha formasaun husi IADE iha tinan anterior ho total membru hamutuk nain 13 (feto 6 mane 7). Atividade ne'e realiza ho apoiu fundu husi SASKAS.

- ❖ Iha fulan Marsu 2024, Programa Saude Reprodutiva no Seksual Integradu, hala'o monitorizasaun ba sentru Maternidade Emergency Obstetric Newborn Care (EmONC) iha Gleno no Postu Saude iha postu administrativu Passabe, Oesilu no postu Saude Baoknana iha RAEOA; Alein monitorizasaun, halo mos introdusaun programa ba Diretor Saude Ermera no Diretor Saude Regional Oecusse Ambeno, iha Postu saude tolu mak Postu saude Baoknana, postu saude Oesilo no postu saude Passabe. Introdusaun programa ne, halo mos ba xefe suku sira iha area cobertura mak hanesan, xefe suku 7 iha postu Administrativu Ermera Munisipiu Ermera no nomos xefe suku 2 iha postu dministrativu Passabe no xefe suku 1 iha postu administrativu Oesilu. Programa ida ne'e realiza ho apoiu fundu husi UNFPA



- ❖ Iha loron 15 Marsu 2024, Belun hamutuk ho UNDP-GEF, fasilita Avaliasaun Risku ba Vulnerabilidade hamutuk ho comunidade 23 (feto 7 mane 16), hanesan xefe suku Labarai, Xefe aldeia, ho grupu Wee Kaduak no grupu Ai-hun Siriatu no mos lia nain sira husi suku Labarai no suku Belecasak, hola fatin iha sede suku Belecasak.

KONA-BA REVISTA NE'E

Desde estabelesimentu Sistema atRes iha Belun iha tinan 2008 to'o 2016, sistema ne'e kobre Munisipiu hotu iha Postu Administrativu 43, maibe ho limitasaun finanseiru ne'ebé organizesaun hasoru, iha 2017 sistema ne'e para provizoriu.

Hahú reativa fali iha 2018 ho apoiu husi UN Women ho Programa Feto Pas no Seguransa ho area kobertura ba de'it iha Munisipiu Baukau, Covalima no RAEOA. Iha mediu 2019 (Maiu – Setembru) kobre tan ba Munisipiu Dili (iha postu administrativu 6) ho apoiu finanseiru husi DAP-DFAT.

Iha tinan hanesan, ho apoiu Governu Alemaña, GIZ, sistema atRes kontinua reativa fali iha Munisipiu 4, Dili, Baukau, Lautein no Vikeke (Postu Administrativu rua kada Munisipiu).

Iha 2020 ho apoiu Sekretariadu g7+ reativa iha Munisipiu Likisá no ho apoiu UNDP nia Programa Sistema Justisa reativa tan iha Munisipiu Covalima. Iha Jullu 2020 tanba limitasaun orsamentu sistema ne'e paradu provizoriamente to'o Dezembru 2020. Iha tinan 2021 ho apoiu husi Rede Asia Pacific Partnership Atrocity Prevention (APPAP) reativa fali iha munisipiu 2 iha Munisipiu Dili (postu Administrativu 2) no iha Munisipiu Likisá (Postu Administrativu 3).

Iha tinan 2022 ho apoiu fundu husi Komisaun Nasional Chega! I.P (CNC! I.P no Servisu Apoiu Sosiedade Sivil no Auditoria Sosial (SASCAS) servisu atRes nian kobre iha Munisipiu 5, Baukau, Covalima, Ermera, Likisa no Manufahi. Iha 2023 ho fundu hanesan husi CNC! I.P no SASCAS kontinua iha Munisipiu Baukau, Covalima, Ermera, Likisa, Manufahi no haluhan ba munisipiu Vikeke.

Iha 2024, kontinuaun fundu husi SASCAS implementa atRes iha munisipiu Baukau, Covalima no Ermera no ho apoiu fundu husi United Nations Office for Project Services (UNOPS)-Peace Building Support Office (PBSO) implementa atRes iha munisipiu 3 iha Bobonaro, Dili no Vikeke iha postu administrativu 9.

Revista situasaun ne'e relata kona-ba asuntu xavi relaciona ho insidente violénsia no tendensia husi dadus monitorizasaun liuhusi Sistema Atensaun no Responde Sedu (AtReS) iha Timor-Leste durante Janeiru Marsu 2024 iha Munisipiu, Baucao, Bobonaro, Covalima, Dili, Ermera no Vikeke. Tuir lolo'os revista ne'e publika iha Fulan Maiu inisiu maibe tanba kestaun tekniku no limitasaun rekursu umanu, implika ba servisu Sistema atRes nian iha nasional, ne'ebé ikus mai implika mos ba publikasaun ne'ebé tarde. Atividade sira ne'e hetan apoiu fundu ki'ik husi UNOPS-PBSO no SASCAS.

Informasaun kle'an liu iha www.atres.belun.tl

Atu hetan informasaun kléan liutan, favor kontaktu:

Luis da Costa Ximenes, Diretor Belun, luis.belun@gmail.com

Romaldo Caetano, Jestór Dadus AtReS: romaldo.belun@gmail.com

Jesuína Maria do Rosário Abel, Analista Dadus AtRes, jesuina.belun@gmail.com